



大清文宗協天翊運執中垂謨懋德振武聖孝淵恭端仁寬敏
顯皇帝實錄卷之五十四

咸豐二年壬子二月丁酉諭內閣三月初二日

皇考宣宗成皇帝奉安

慕陵禮成後奉

神牌黃輿回京。所有經行道路。宜較常時倍加整肅。著傳諭派
出之管道大臣。督率官兵等嚴行稽查。概不准隨扈執事員
役車馬踐踏。如有疏縱。或經人叅奏。或由朕查知。惟管道大
臣是問。並著訥爾經額。飭知沿途地方官敬謹看守。一體管
束。並勤加修治。以昭嚴肅。○河東河道總督顏以燠奏。運河

北路挑工。剋期可竣。並周查各廳工料。豫籌修守。得旨。挑撈運河之時。妥慎趕辦。以無礙重運為要。○工部右侍郎奕毓因病請解任。允之。命仍為

實錄館國史館副總裁官。並賞給二品半俸。○調工部左侍郎錫齡為右侍郎。兼管錢法堂事務。以鑲紅旗滿洲副都統哈芬為工部左侍郎。○戊戌。

上詣

壽康宮問

皇貴太妃安。○諭內閣。和色本等奏清理蹕路一摺。鑾輿經行道路。理宜整肅。此次豫備恭奉

神牌黃輿回京。尤宜加意慎重。昨已有旨。令管道大臣。及直隸總督嚴飭稽查。著訥爾經額。即查明分段弁兵員名人數。咨交管道大臣。俾督率可期得力。該督仍飭地方官。一體實力巡查。不准車馬踐踏。以昭嚴肅。○兩江總督陸建瀛奏。前督臣陶澍於淮北極疲之時。議改票鹽。一切規模。數年而後定。現聞淮南議論紛紛。意欲更改章程。業經出示查禁。俾人心不致搖惑。得旨。慎勿為浮言所惑。著傳諭劉良駒。斷斷不准將就。若稍有搖惑。則前功盡棄矣。○以國子監祭酒穆蔭為光祿寺卿。○賞江西等省辛亥科鄉試年老諸生徐金章等五十五人。舉人。副榜。有差。○己亥。祭

先農之神。遣莊親王奕仁行禮。○諭內閣。賽尚阿奏。南邕兵勇攻破那勤賊巢。殲擒多名。一摺。粵匪顏品瑤餘黨。在靈山縣新鋪那勤地方。分踞日久。經兩省兵勇疊次圍攻。連獲勝仗。藩司勞崇光。與左江鎮惠慶。定計先攻那勤賊巢。密遣土人偽為接濟柴米。溷入賊營。乘機反間。並分派兵勇。知會廣東提督陶煜文。高廉道沈棣輝。定期分路進攻。直逼賊巢。該匪不料我軍冒雨突至。未及點礮。即開柵出拒。我兵先於山路潛伏柵後。見匪出巢。即從半山衝下。施放火具。立將柵木燒斷。延及該匪收藏火藥房屋。乘勢掩殺。斃賊甚眾。其新鋪救應之賊匪。亦經東省兵勇。先期設伏。迎頭堵截。擊敗回巢。

不敢出援。此股匪徒。負險拒守。甚屬狡悍。勞崇光。惠慶。及參將德亮等。設計用間。於除夜冒雨焚毀賊巢。殲擒殆盡。謀勇兼施。實堪嘉尚。著即督飭在事文武。會合兩省兵勇。乘銳前進。將新鋪賊巢一律蕩平。並將帶傷逃竄之首匪蘇凝。三嚴拏務獲。毋任遠颺。把總張鴻才。疊次裹創力戰。奮不顧身。勇敢異常。著即以千總升用。此外出力官紳員弁兵勇。查明據實保奏。候朕施恩。○又諭。賽尚阿奏。連次轟擊賊巢。進兵獲勝情形一摺。據稱南北各路圍攻。永安逆匪。節次進逼。該匪堅拒不出。正月二十八日以後。官兵連用大礮。四面轟擊。城內外賊屋擊塌無數。並遣勇壯誘賊出巢。節次殺斃多名。其

往來羅甕水竇之賊。均被兵勇堵截抄殺。現在仍用礮連環轟打。並斷其爨汲路徑等語。逆匪抗拒日久。兇狡異常。自該大臣親抵永安城外。督飭大兵占據山嶺。合力環攻。匪勢日就窮蹙。著即趕造攻具。督率將士。迅掃妖氛。勿任竄逸滋蔓。○又諭賽尚阿奏。遵查降補都司不知愧奮。請旨革職等語。趙如勝前於擢升四川北鎮總兵後。因徐廣縉等奏請留粵防勦。託故遷延。降旨以都司降補。發往廣西軍營差委。該員苟有天良。應如何感激圖報。以贖前愆。乃自派往南太之後。仍復不知愧奮。於賊竄靈山時。經惠慶等派帶兵勇赴崎嶇會勦。輒以兵單為詞。多方藉口。實屬畏葸無能。有心巧飾。

僅予革職。不足蔽辜。趙如勝著革職。發往軍臺效力贖罪。以示懲儆。○諭軍機大臣等。本日據賽尚阿奏。擊賊獲勝。並連日陰雨情形一摺。此股賊匪負嵎日久。雖官軍屢次戰勝。而其兇狡之狀。百出不窮。悖逆多端。實堪髮指。細察各路勦辦情形。自正月二十四日。至二月初二日。將士辛勤。人人用命。該大臣盡心竭力。備極憂勞。朕懷時深廕念。該匪醜類眾多。屢經官兵勦戮。勢已窮蹙。且困守孤城。果能斷其米鹽火藥接濟。及爨汲路徑。釜底游魂。豈能持久。現在南北兩路圍攻。逼近城垣。務須嚴飭在事文武。戮力同心。滅此朝食。其著名首逆。尤當悉數殲擒。萬勿稍有疏虞。致令兔脫。所望晴霽連

旬。

上蒼默佑。攻戰得力。迅奏蕩平。該大臣諒亦知朕寢饋之不安矣。徐廣縉現駐信宜。前已諭令該督將凌十八股匪迅速殲除。後即督帶官兵乘勝馳赴永安。與該大臣合力圍攻。庶兵力更厚。且可截擊逆匪逃竄之路。所有應用軍餉。前飭戶部寬為儲備。并著咨催各省。將未經起解之款。速行解粵。不知廣東勸捐兵餉。成數若干。著即飛咨徐廣縉葉名琛。有可撥解應急之款。先行儘數解赴粵西軍營。較部解及各省批解。更為捷近。另單所奏。思恩。泗城。鬱林。新甯。天保。遷江。貴縣。各府州縣屬。奇零餘匪。或漏網殘生。或倉猝嘯聚。各該地

方員弁隨時勦滅。尚多脫逃之犯。閭閻未能安靜。仍著督飭藩司勞崇光率屬妥辦。現在靈山縣那勤地方賊巢。業經焚毀。斬擒殆盡。若再將新鋪地方股匪殲除。則南太一帶。不難次第肅清。專盼永安捷音。早晚入告也。所有出力之文武各員弁兵勇。著該大臣詳查據實保奏。其陣亡兵勇。著分別咨部議卹。將此由六百里諭令知之。○又諭。有人奏。河南許州知州金梁暨候補知縣沈姓。奉委查辦南陽府屬各案件。逐處勒索差費。派銀二百兩。至五百兩不等。其銀兩現存南陽縣庫中。裕州知州姚慶溥。未給差費。金梁等挾恨誣陷。以唐縣為南陽所轄。青臺鎮捻匪滋擾。將姚慶溥職名填入。為陷

害之計。又省城發審局委員郎仲連。任孟縣時。因錢糧加價。釀變撤任。任尉氏縣時。復因錢糧加重。被控撤任。現在發審局。藉案嚇詐等語。委員索費陷誣。劣吏挾權盤踞。若不嚴行懲辦。何以肅吏治而儆官邪。著李德嚴飭確查。所稱青臺鎮地面。是否與裕州毗連。南陽縣庫。有無勒派銀兩。郎仲連有無招搖實據。其前兩任內撤任案據。著一併查明據實參奏。毋稍徇隱。原摺著鈔給閱看。將此諭令知之。○馬蘭鎮總兵官慶錫奏。循案擬請伐除

東陵海地樹株。得旨。著照所奏敬謹辦理。○兩江總督陸建瀛。江南河道總督楊以增奏。啟放引河。溜勢十分暢順。現在趕

鑲門占。一俟盤壓堅固。即可相機合龍。得旨。仰賴

天神佑助。益增感畏。忻慰覽焉。○欽差大臣大學士賽尚阿奏。連次轟擊賊巢。進兵獲勝。並連日陰雨情形。得旨。雖連次獲勝。而該逆仍負隅不出。覽奏曷勝憤悶。卿奉命出師。將及一載。朕不得不屢次嚴催。卿斷不可過為焦急。致傷身體。朕之苦心。諒卿亦必知之。○以浙江杭州協副將尚安泰。為甘肅甯夏鎮總兵官。○以攻奪廣西古眉峽賊營。賞都司銜武舉張騰驤等花翎。把總李登朝等藍翎。餘升敘有差。○予廣西永安陣亡把總丁占元。外委藍道昌。祭葬世職。○賞給內務府馬蘭峪官房四十餘間。為辦事公所。○庚子。諭內閣。徐廣

續葉名琛奏圍勦羅鏡逆匪。連獲勝仗情形一摺。逆匪凌十
八一股。自竄踞羅鏡墟以來。負隅拒守。該督徐廣縉於上年
十二月進駐信宜。督飭挑濠築牆。以防逃竄。該匪屢次衝突。
俱被我兵奮勇抄截。擒斬多名。無一走脫。現在賊勢坐困。訊
據獲犯供稱。自挑濠築圍以後。接濟全斷。墟中鹽糧將盡。計
可一鼓勦除。著即嚴飭在事文武。督率兵勇迅速進攻。務將
此股逆匪聚而殲旃。毋任餘黨竄逸。另摺奏廉州會勦匪徒。
攻破那勤賊巢等語。昨已據賽尚阿奏到。此次兩省官兵。用
計設伏。將那勤賊匪殲擒殆盡。均堪嘉尚。著徐廣縉仍飭兩
省帶兵文武。乘勝會合。將新鋪賊巢一併掃蕩。勿留餘孽。○

諭軍機大臣等。本日據徐廣縉等奏。請撥粵海關稅。以濟廣
東軍餉一摺。據稱接奉部行接濟團練章程。業經出示曉諭。
一俟捐有成數。即行儘解廣西。惟自上年十月停止捐輸以
後。一切經費。計無所出。是該省自行動用之款。已形支絀。而
接濟西省之項。亦關緊要。著該督等再行籌畫。如現在停止
捐輸。於軍餉急需。實有窒礙。即著查照該督等原議捐輸章
程。一面迅速奏聞。一面妥為辦理。總期有裨實用。無誤事機。
於兩省軍需。得以源源接濟。諒該督等亦深知近來撥解惟
艱。必能通盤籌畫。辦理妥善也。將此由四百里諭令知之。○
盛京將軍奕興等奏。請將被控協領榮琪革職提究。得旨。榮

琪著革職。交奕興嚴行審訊。從重定擬。○以吏部左侍郎邵
燦兼署工部右侍郎。兼管錢法堂事務。○辛丑
上奉

皇貴太妃啟鑾。恭謁

西陵。○至盧溝橋詣

龍神廟拈香。○詣

皇貴太妃行宮問安。至還宮。皆如之。○遣官祭賢良祠。○以
宣宗成皇帝梓宮奉安

山陵。恭奉

神牌黃輿回京。賞經過地方平毀麥田籽種銀。○是日。駐蹕黃

新莊行宮。○壬寅。諭內閣。奕山所進菊花青馬。朕乘騎甚好。
著賞給松華駿名號。並著加恩賞給奕山八絲大緞二疋。○
頒浙江甯波府殉節兩江總督裕謙專祠

御書扁額。白忠蓋承家。○加給浙江省減歇幫丁米石。○撫恤
朝鮮國遭風難夷如例。○是日。駐蹕半壁店行宮。○癸卯。諭
內閣。張祥河奏。紳民請建原任巡撫專祠一摺。林則徐前在
陝西巡撫任內。居官慈惠。率屬廉明。其籌辦撫賑。培植學校。
嚴懲奸宄。諸政蹟。均於地方有裨。現據該撫奏稱。該省西安
同州鳳翔等屬紳民。公懇建立專祠。著准其擇地捐建。以表
臣績而順民情。○是日。駐蹕秋瀾行宮。○甲辰。

上詣

永福寺拈香。○諭內閣載垣等奏。本日自行宮以至沿途。在後隨從人等。均在

神牌御道路上行走。將未經管轄之侍衛章京等。奏等語。左翼後扈侍衛奕實。蘇克通阿。端倫。博啟。特克什赫。經文。祥英。惠鑑。恆齡。鄂肅。帶領後扈章京。惠增。均著罰俸六箇月。嗣後如有在

御路上。似此以車馬踐踏者。著該管侍衛章京等。嚴拏懲辦。○諭軍機大臣等。劉源灝奏。籌辦海防情形一摺。本年海運。山東省水師將弁。不敷巡防。自係實在情形。惟請飭江蘇。遴派

武職大員。北來防衛一節。業據陸建瀛等。奏定章程。並分咨山東直隸等省。沿途接護。又據稱。飭令江蘇在籍員外郎王承基。安徽候補知縣沈譽來等。雇募水勇。分為頭尾兩幫。督押糧米起運。是江蘇已有勇船防護。不致漫無約束。况米船現經陸續開洋。若此時始令派委大員。轉恐遷延時日。緩不濟急。該署撫仍照現定章程。妥為辦理。毋庸再議更張。至登州鎮總兵武迎吉。計日即可到任。該省水師情形。應如何整頓之處。即著與該鎮隨時會商籌辦。實力操防。毋得稍存諉卸。致有疏虞也。將此諭令知之。○賞請轎之鑾儀衛校尉銀。○賞蹕路經過看守各行宮弁兵。半月錢糧。○展賑山東濟

甯嘉祥。金鄉。魚臺。滕。嶧。六州縣。並臨清。濟甯。兩衛。被水災。民
一月口糧。○是日。駐蹕梁格莊行宮。○乙巳。

上恭謁

泰陵。

泰東陵。

昌陵。俱未至碑亭。即降輿慟哭。步入

隆恩門。詣

寶城前。行禮。躬奠哀慟。王以下文武大臣。均隨行禮。○詣西朝

房更衣幄次。御素服。冠摘纓緯。詣

昌陵饗殿。

孝和睿皇后梓宮前。行饗奠禮畢。詣西朝房更衣幄次。御縞素。

恭謁

慕陵。未至碑亭。即降輿慟哭。步至

隆恩殿。

宣宗成皇帝梓宮前。行饗奠禮。哭踊無算。哀動左右。至燎所奠
酒畢。詣東朝房更衣幄次。御素服。詣

孝穆成皇后

孝慎成皇后

孝全成皇后寶城前。行禮畢。閱視

寶城。○諭內閣。王慶雲。聯英。奏。遵旨查明山西清查情形。並參

員追款一摺。山西清查章程。既經兩次釐定。由部議准。一切應追應解各款。著即由該撫分別報部查覈。其彌補舊虧。有酌提優缺羨餘一節。恐啟那新掩舊之弊。嗣後州縣交代。該撫務當嚴飭該司。截清款項。禁止通融。斷不准以前任無著之款。累及後任。儻該管上司。抑勒接受。及虛出通關。希圖掩飾。即著一併叅處。○又諭。前因已革山西太原縣知縣王倬。稟訴上司。揭叅不公等情。當降旨交王慶雲。聯英查辦。茲據該侍郎等奏稱。訊明該革員。於地方連劫盜案。規避捏報。被叅後。輒指為道府授意知情。臬司挾嫌洩忿。各情全係虛誣。居心實屬險詐。王倬著從重發往軍臺效力贖罪。應追清查

案內未完銀兩。著該撫照例辦理。○是日。駐蹕妃圍寢前御營。至辛亥皆如之。○丙午。

上詣

慕陵。未至碑亭。即降輿慟哭。步至

隆恩殿

宣宗成皇帝梓宮前。行朝奠禮。自是日至庚戌皆如之。○詣昌西陵。閱視工程。並閱視

慕陵後山。○諭內閣。訥爾經額奏。拏獲形跡可疑人犯。請旨審辦等語。回民楊逢年。於夜間在秋瀾行宮前空地坐歇。被官兵盤獲。著交行在刑部審明辦理。藍翎侍衛何瀛。著聽候傳

質。其看守圍鏡。疏於防範之官兵。著俟定案時。查明覈辦。尋刑部奏。訊明楊逢年。因與何瀛認識。乘夜往覓借錢。擅入鎧城。按律擬杖六十。徒一年。從之。○命莊親王奕仁。在御前行走。○賞已革刑部左侍郎寶清。三等侍衛。為駐藏幫辦大臣。○豁免湖廣荊州。荆左。荆右。沔陽。岳州。五衛。並湖南華容。臨湘。益陽。澧。巴陵。湘陰。六州縣。道光二十九年以前積欠錢漕。並各項銀米。○丁未。

孝昭仁皇后忌辰。遣官祭

景陵。○戊申。

上至梁格莊行宮停蹕。閱視魏家溝山勢。○己酉。以

宣宗成皇帝梓宮奉安

山陵。前期三日。遣官告祭

天

地

太廟

社稷。○諭內閣。賽尚阿奏。進攻永安逆匪。屢獲勝仗一摺。並片奏。南太一帶賊匪肅清等語。二月初七初十十三等日。我兵南北兩路進攻賊巢。斃匪甚多。惟因連旬暴雨。未即大舉深入。該大臣仍當激勵將士。相機進剿。殄此醜類。無稍疏縱。至新鋪賊巢。經兵勇攻破。首匪顏三。臨陣斬獲。其甯明州。及龍

州一帶巨匪黃東太。翟二。並偽軍師陳樹禮。均各就擒。南太一帶業已肅清。廣西藩司勞崇光。自赴南太以來。與東西兩省文武會督勦賊。調度有方。將匪黨悉數埽除。洵堪嘉尚。勞崇光著賞給頭品頂帶。以示獎勵。所有出力之文武員弁。兵勇人等。著該大臣查明保奏。候朕施恩。該省現有波山艇匪。在梧州一帶滋擾。即著勞崇光乘勝帶兵馳赴該處。督率地方文武。迅速翦除。勿令勾結延蔓。仍嚴防永安賊匪逃竄之路。與大軍聲勢聯絡。定當即日奏功也。○諭軍機大臣等。賽尚阿奏。連日進攻。並雨水過多情形。又據賽尚阿。鄒鳴鶴奏。追捕波山賊船各一摺。永安城外南北兩路。經烏蘭泰。向榮。

連日進攻。雖屢有斬擒。皆因雨水過多。攻具難施。以致未能攻入。朕心實深焦灼。逆匪困守孤城。勢已窮蹙。我兵攻具。現既陸續齊備。即當密飭帶兵大員。相機攻勦。破其礮臺。與莫村水竇倚角之勢。斷其鹽米火藥接濟之路。並分派將弁。各路埋伏接應。俾賊首尾不能兼顧。庶可一鼓殄滅。據稱日日攻擾。使賊不能竄逸。固宜如此辦理。惟我兵槍礮。徒費鉛藥。而鉛子轉為賊所取資。且負隅死守。牆濠外蔽。賊匪內藏。出入自由。互相援救。似此堅持坐耗。何日是破城之時。用兵之道。計謀為先。總當相度地勢。出奇制勝。若既不能設法用間。復不能嚴斷接濟。一味奮勇。冒險前進。徒勞無益。殊為可惜。

該大臣讀朕批示。當與烏蘭泰、向榮熟籌破賊善策也。至波
山賊船。滋擾近江各郡邑。已歷數月。現已諭令勞崇光速赴
梧州督辦。該匪船至藤縣城下。屢次攻撲。並有欲到梧州攻
奪府城。及永安逆匪約會之說。不可不迅速翦除。該大臣現
已分飭弁兵。兼程前往。並飛咨東省快蟹巡船。攔頭截擊。即
著督飭藩司勞崇光嚴飭在事文武合力堵剿。勿令勾結蔓
延。張釗等既有反覆情形。即當不動聲色。妥為駕馭。仍著勞
崇光隨時察看。斷不可受其欺蒙。致貽後患。尤不可寡斷生
疑。使得肆志。此事辦理稍柔。關繫匪輕。仍應慎密為之。其那
勤匪首蘇凝三。是否業經殲斃。抑係脫逃。仍著查明具奏。將

此由六百里諭知賽尚阿。並諭令鄒鳴鶴知之。○庚戌。兩江
總督陸建瀛等奏。豐工引河放後。猝遇風暴。大壩門占蟄動。
現仍竭力趕辦合龍。得旨。卿等竭盡心力。妥慎趕辦。朕虔祈
天佑。以待佳音。○閩浙總督李芝昌奏。水師副將遵保林建猷。
葉萬清。二員。此外別無可保。得旨。閩浙兩省水師參將遊擊
內。如有熟悉洋面。才能出眾者。據實奏聞。不准冒濫。○以福
建閩安協副將林建猷。為福甯鎮總兵官。

大清文宗協天翊運執中垂謨懋德振武聖孝淵恭端仁寬敏
顯皇帝實錄卷之五十四

